

蜀

水

經

蜀水經卷之十四

京山李 元太初

巴水

巴江源出南江縣北大巴山

大巴山爲古巴國高聳千尋巖徑之險過于連雲棧  
下通漢中要路其東相連爲小巴山上多雲霧盛夏  
積雪險次於大巴而高峻過之

巴江西南受蟒潭水蟒潭水源出孤雲山流爲韓溪南  
入巴

孤雲山與兩角山相接有石刻蕭何追韓信處玉堂  
閒話曰蜀興元之南路達巴州溪谿谿巒巒捫蘿摸石  
一上三日始達於山頂行人止宿則以繩蔓繫腰縈  
樹而寢不然則墮溪澗如淪黃泉也復登指大嶺蓋  
稍平處其絕頂謂之孤雲兩角淮陰侯廟在焉諺云  
孤雲兩角去天一握輿地紀勝曰米倉山與大巴山  
相連有韓信廟及截賢嶺云蕭何追韓信至此按孤  
雲兩角米倉山皆大巴山之異名今褒城縣北乃有  
追韓信之碑誤也孤雲山在褒城縣南一百二十里

蓋褒城與南江地界相隣

巴江又南經南江縣城東爲難江

南江縣故漢昌地也梁大同中分置東巴州魏恭帝二年改東巴州爲集州竝置平桑郡周天和五年分置難江縣曲細縣隋開皇末廢郡改曲細爲長池屬清化郡大業廢集州以難江屬漢川郡唐武德元年復置集州分置靜州狄平縣大牟縣二年徙靜州治狄平改狄平爲地平九年分置平桑縣貞觀六年省平桑長池十七年大牟改屬巴州永泰元年改屬集

州改地平爲通平天寶改州爲符陽郡乾元復故屬  
山南西道寶歷元年省通平入大牟宋乾德五年省  
大牟熙寧五年廢集州元至元十二年省難江入化  
成明正德十一年置南江縣屬保寧府○隔江學署  
卽古集州城西三十五里有平桑故城西南五十里  
大牟山下有大牟故城南八十里長池壩卽長池故  
城○城北一里菖蒲澗懸巖峻壁石室空曠有唐開  
成四年碑或謂唐集州刺史蘓味道記石武功男子  
記曰巨石巒倚嘉木交映空森峻聳奇勢異狀綠苔

青蒲印模履踪捫手揆足無非蒼翠

巴江又西南折流爲几水

水流曲折如几字南岸有公山亦名白鹿山衆山崩  
披此山處其中狀爲公字登城樓望之宛然山半有  
威惠廟碑目謂唐天寶元年田彥謙撰記廟神張魯  
也張魯何得廟祀豈其鬼道惑民而民信之耶千載  
血食民愚滋甚可見鬼神之說最足以惑愚此佛氏  
之所恃以不廢也漢有智無雙之任文公嘗避王莽  
而攜妻子隱於公山不亦賢於張魯耶

巴江又西南受羅溪羅溪源出三角山流爲紅鯉溪又東南爲羅坪河入巴

三角山亦名小巫山有十二峯蓮花峯爲秀洞高百丈內處千人外有深淵環之勝覽曰十二峯在難江縣北四十里馬盤灣巉巖聳秀最爲奇觀有客題詩曰插立翠屏峯十二爲君喚作小巫山

巴江又西南受沙河

舊巴江之水舟通縣城爲險巖鋪石山倒塌堵塞河道今舟行止於此矣

巴江又西南受明水明水源出小巴山爲南屯河南經  
檇林關有三小溪注之西滙爲七里潭又西經兩河口  
入巴

明水卽水經之槃余水也寰宇記曰明水在難江縣  
北五十里水出石硯草木山川之形隱於石間

巴江又南經元灘

故盤道縣也江行至此始得平原以爲空濶之觀矣  
寰宇記曰魏恭帝改難江縣曰盤道因龍腹山道路  
盤曲而名



巴江又南經王望山

亦名黃牛山楊義仲記曰山有二洞左曰東洞門如  
鑊鑿高幾三百尺耀若大儀之庭兜率之宮又百餘  
步則空穴開明石犬石馬詭形怪狀莫不畢獻又六  
七里通後山之根右曰西洞其奇怪亦亞於東洞矣  
九州要記曰黃牛山有穴白馬奔出因名白馬泉按  
圖經謂晉仙人王望之所居望字子濛常騎白驢朝  
入長安市暮回漢昌唐開元中元宗幸蜀遇之州志  
謂元宗控騾於此而望宮闕夫元宗避難何得迂行

至此且此山又安得見京闕志乘家之附會不通往  
往如此圖經已屬荒唐州志更爲悠謬

巴江又南經巴州城東

巴江至州東南分爲三流而一里復合中有小流橫  
貫如巴字亦名字水唐李遠詩巴江字水流張禕詩  
水轉巴文清溜急是也

巴州故漢昌縣也漢永元中分宕渠之北置屬巴郡  
齊建元二年置巴州梁改巴州爲歸化郡漢昌爲梁  
廣縣梁普通六年又分置北水郡難江縣哀戎郡其

章縣木門郡伏疆縣天監中分置白馬郡義陽縣西  
魏正始元年改歸化爲大谷郡延昌二年改大谷爲  
巴州而義陽改屬江州三年改雞江爲盤道縣後周  
天和三年義陽改屬巴州大象二年改梁廣爲化成  
縣隋開皇三年諸郡並罷以巴州領之十八年改義  
陽爲恩陽伏疆爲清化大業改巴州爲清化郡唐武  
德元年復爲巴州貞觀十七年省恩陽萬歲通天元  
年復置夙觀元年置七盤縣屬巴州天寶改巴州爲  
清化郡乾元復故屬山南西道寶歷元年省其章入

化成省盤道入恩陽長慶中復置盤道大中元年復置其章宋爲巴州清化郡乾德四年省盤道入清化咸平二年清化改屬集州熙寧二年省七盤入恩陽五年廢集州省清化入化成省其章入曾口元至元二十年省恩陽入化成明洪武九年改州爲巴縣省化成入之屬保寧府正德十年復爲巴州○州治南二里有唐章懷太子賢墓高如小阜高宗上元二年立雍王賢爲太子永隆元年八月廢爲庶人開元元年十一月徙巴州嗣聖元年爲武后所殺或銘其墓

日斷一指得天下凡人不能殺愛子竊帝位武后行之噫嘻太子之遺隧萬世之元龜。愚按南齊建元二年始置巴州則晉宋以前無巴名也州西二十里平梁城是宋淳祐間都統張實所築俗傳桓侯故址而王象之碑目載巴州城西門有嚴將軍廟記是唐貞元元年韋曾文則傳訛从矣考陳壽書張桓侯與孔明等泝流而東分定郡縣至江州破巴郡太守嚴顏則與今巴州無涉○州東三十里有其章故城其章卽奇章唐相牛僧儒封地東南四十里有會口故

城東南一百二十里有歸仁故城西南八十里有恩陽故城西北六十里有清化故城西北一百二十里有七盤故城

巴江又東受清水清水源出廣元縣麻石埡爲土溪東經通平鎮爲清化江又東經恩陽縣又東入巴

巴江又南經曾口故城受升渡水升渡水源出花叢埡之麓東南入巴

巴江又東南受諾水諾水源出南鄭縣南青石關南經羊圈關又南經通江縣城西壁山下爲西河又折而東

流受宕水宕水源出大巴山洞中西南受白石水白石水源出西鄉縣南南經竹浴關又南經水口入宕宕水又西經哨口分爲二派又西經毛裕鎮合流又西受龍溪又西南入諾諾水又西南經平州故城爲平州水又西南經江口鎮入巴

通江縣故漢昌地也蜀漢分置平州縣屬巴西郡梁天監六年分置始寧縣曾口縣屬清化郡平州縣改屬遂寧郡西魏分置諾水縣屬遂寧郡又分置其章郡符陽縣白石縣周改平州爲同昌縣隋開皇三年

省諾水入始寧十八年改同昌爲歸仁唐武德三年  
分置廣納縣八年復置諾水縣又置壁州屬山南西  
道唐開元中分置太平縣天寶改壁州爲始寧郡改  
諾水爲通江改太平爲東巴寶歷元年省廣納大中  
初復置宋乾德四年省始寧入其章東巴入通江歸  
仁入會口五年省廣納入通江熙寧五年廢壁州及  
符陽白石二縣以通江屬巴州尋分上下通江元至  
元二十年省入會口縣至正四年改會口爲通江明  
改屬保寧府○縣治卽古壁州以縣西南壁山名也



峭絕入壁下臨諾水唐中和中壁州刺史鄭凝績侍  
養其父丞相鄭畋于此畋圖父子像于山寺中而爲  
之記山上有玉鞭池有人拾玉鞭於此故朱慶餘詩  
云江分入峽路山見採鞭人相對爲歌籟山石鼓聲  
聞數里連擊則雨有城甚險峻○縣北七十里有符  
陽故城東北一百里有白石故城東一百四十里有  
東巴故城南五十里有廣納故城

巴江又東南經三匯鎮注於渠江

水經注曰宕渠水西北出南鄭縣巴嶺與槃余水同

源派注南流謂之北水東南流與難江水合難江水  
出東北小巴山西南注宕渠水又東南流經宕渠縣  
又東南入于漢渠縣有宕渠一名大岡山圖經謂其  
山東西兩門延連相接山澗長狹有似溝渠水經其  
地則水所由名也

渠水

渠江源出太平縣東北大橫山

渠江亦名益遷水在東關故縣境內亦謂之東關水  
寰宇記謂水出建平山卽大橫山羣山夾護相連爲

花岳山世傳漢隱士花岳所居關索從受兵書於此  
按小說謂關帝第三子索其母胡氏孕三月逃難而  
生養於索家從花岳學因名花關索夔州鮑氏女勇  
力絕倫廉康求娶不屈與戰破之索往攻不勝遂降  
爲索妻後隨昭烈入蜀有功命鎮雲南卒民德之爲  
立祠曰誼勇英武威烈感應順忠王今昭化有城簡  
州有寨中江有坪永寧有嶺皆以索名此無據之言  
而謝肇淛滇畧諸葛元聲滇事紀畧皆載之雲南通  
志謂關隘險峻引之以索而後能度滇黔紀遊謂關

鎖之訛滇行紀程謂諸苗呼父爲索猶言關父此雖臆見考陳壽史關帝實無第三子索也

渠江又西南經太平縣城西北

太平縣故宜漢地也宋分置巴渠郡巴渠縣東關縣梁分置東關郡南晉郡西魏廢帝二年置并州移治宜漢縣周改南晉爲和昌郡省東關郡隋開皇廢郡州及巴渠五年改東關爲宜漢唐武德元年復置南并州東關縣貞觀元年州縣俱廢永泰元年復置巴渠縣屬通州太和三年巴渠改屬開州四年復故宋

乾德四年省宜漢入東鄉崇寧六年置通明縣元至  
元二十二年巴渠通明俱廢明正德十二年分東鄉  
之太平里置太平縣屬達州○寰宇記謂東鄉縣北  
一百七十里宣漢縣縣東一百五十里南晉郡郡西  
百步并州今故城無考巴渠明通在縣東北

渠江又西南會白沙河爲後江

渠江又西南受中江中江源出百支山西受石塘溪又  
西受全溪全溪源出龍潭又南受廠溪又西南經鐵鑛  
山入渠

龍潭有七十二浦四十八渚匯而爲潭大踰百泓溪不可測實爲龍谷

渠江又南受前江前江源出金城山南經明通峽又西受長樂水長樂水源出長樂鎮合白龍泉赤甲泉入於前江又西南入渠

明通峽卽舊鹽井大山相夾壁立萬仞天如一線數十里絕無平隙鹹泉出龍骨石窟中有兩穴魚以春社出穴經龍脊灘而止○明通峽東北有萬頃池是楚春申君故居在峽口山之南幽谷溪箐水澗爲池

水分四道一爲北江經陝西紫陽縣爲大竹河入東漢一經大寧縣爲大寧河入大江一爲奉節縣之東瀼水一爲雲陽之湯溪

渠江又西經東鄉縣城南爲下蒲江

渠江經東關縣爲東關水經下蒲縣爲下蒲江經通川縣爲通川江經宕渠縣爲宕渠江

東鄉縣故宣漢地也宋分置下蒲縣屬巴渠郡西魏分置石州東鄉縣後周廢州置三巴郡隋廢郡省下蒲以東鄉屬通川郡唐武德三年復置下蒲又分置

南石州昌樂縣八年州廢省昌樂入石鼓省下蒲入  
東鄉元至元二十年省東鄉入達州明成化元年復  
置

渠江又西受瀘溪瀘溪源出梁山縣北寶泉山西合龍  
泉山之玉帶溪合流爲雙溪又西受大竹水大竹水源  
出大竹山西經風洞入瀘瀘溪又東南經瀘灘又東經  
捍城山受聯珠溪聯珠溪源出新寧縣南山谷西北經  
七里峽又西入瀘瀘溪又西北經老君洞入渠

瀘灘緣溪里許有龍洞重門複穴以炬入極深處垂



乳纓絡其上珠聯玉綴謂之龍窟

新寧縣故宣漢地也西魏分置新寧縣又改新安郡  
爲新寧移治之隋廢郡省新寧入通川唐武德二年  
復置新寧屬通州太和三年改屬開州四年復故明  
洪武四年省新寧入梁山十四年復置屬夔府 國  
朝康熙七年省入梁山雍正七年復置十二年改屬  
達州

渠江西經達州城南受鳳凰泉

鳳凰泉源出城北鳳凰山寶芝洞泉自洞出衝山湫

口散而爲孔與土相雜積爲峯巒之狀嵌空奇峭自然天成民掘斫得之以植菖蒲爲玩也城西有烈女山宋皇祐二年碑云菱婦趙氏守志爲兇人所殺

達州故宣漢縣也漢和帝分宕渠之東置屬巴郡晉分置晉昌郡石鼓縣梁大同二年改宣漢爲石城又置萬州萬榮郡永康縣新安郡三岡縣西魏改萬州爲通川郡又置遷州後周改遷州爲臨清郡隋開皇廢郡爲通州十八年改永康爲永穆石城爲通川大業改州爲通川郡而永穆別屬清化唐武德元年復

爲通州兼置萬州思來縣恒豐縣貞觀元年萬州思來恒豐並廢天寶復爲通川郡九年置閬英縣乾元復爲通州屬山南西道永泰元年分石鼓置巴渠縣寶歷元年省石鼓三岡大中元年復置石鼓五年復置三岡宋爲通州通川郡屬夔州路乾德三年改達州省閬英入石鼓咸平二年改永穆爲永睦熙寧六年省三岡七年省石鼓元至元二十二年省永睦洪武九年改達縣省通川入之正德九年復爲州 國朝雍正六年改州直隸川東道○川西南四十里三

閩故城西北一百里永穆故城東六十里石鼓故城  
北一百二十里閩英故城按宜漢縣漢置在達梁置  
在儀隲隋置在太平

渠江又西經通川縣故城爲通川江

城在山頂

渠江又西經金華山

宋楊晨詩所謂吾州金華峙霄漢也山下有中立石  
屹立江心

渠江又西南受通巴水通巴水左源出月口山右源出

狐狸山合流南入渠

渠江又西南經三匯鎮與巴江會

三匯鎮有螺尾灘在大山峽中石悍浪洶舟楫苦之  
康熙己丑邑令侯承塈鑿西岸石脊水遂平坦因有  
句云浪急浮龍馬風清照石魚

渠江又西受涅水涅水源出獅子山東爲東流溪東受  
柳城溪柳城溪源出柳城山北入涅涅水又東經大竹  
縣城西南又北入渠

寰宇記曰隣山縣城西南北三面有池廻繞東阻涅

水甚險固號爲金城湓水自忠州清水縣界流入隣山縣城東二十步

大竹縣故宕渠地也梁大同三年分置鄰山縣屬鄰州隋開皇縣廢唐武德元年復置縣又置鄰州鹽泉縣八年州縣俱廢而隣山屬渠州久視元年分置大竹縣至德二年省大竹入隣山大中復置宋景祐三年省大竹入流江紹興三年復置元至元二十年省隣山入大竹明洪武初改屬廣安州 國朝改屬順慶府○大竹縣舊城在縣北鳳來鄉元至元二十年

移治木門鎮卽今治也縣東門外有二小岡地勢相

連土色各異上有兩木對生交合如闕謂之木門

渠江又西受露水露水源出九盤山爲竹溪東北受白水溪又北爲清溪入渠

白水溪源出白水洞口廣數丈深不可測水色瑩白自洞口飛出雷震千山珠簾百丈爲瀑布奇觀

渠江又西南經渠縣城東受流江流江源出大儀山流經金城山下南經儀隴縣城西東南經合江口受平溪又東南經營山縣北爲驗江又南受消水消水源出儀

隴縣西靈星山南經良山故城東又東南經宕渠故城  
西又南經蓬山故城東又南入流流江又南滙爲七曲  
堰又東南經江石灘入渠

渠縣故賓國也莘姓子爵亦作宗頃王四年執宗子  
圍巢卽此漢置宕渠縣屬巴郡蜀先主分置宕渠郡  
晉李壽叛後地爲諸獠所據而郡縣悉廢梁置渠州  
北宕渠郡宕渠縣後魏改流江郡流江縣隋開皇廢  
郡大業復置宕渠郡唐武德元年改渠州分置始安  
縣豐樂縣義興縣三年改始安爲賓城八年省豐樂



義興天寶元年改賓城爲渠江又改州爲隣山郡乾  
元復故屬山南西道宋爲渠州隣山郡屬潼川路寶  
祐三年徙治禮易山元至元十一年置渠州安撫司  
二十年罷司屬順慶路明改渠縣省流江入之○華  
陽國志曰長老言宕渠蓋爲故賓國今有賓城秦昭  
襄王有白虎爲害自秦蜀巴漢患之秦王重募國中  
有能殺虎者邑萬家金帛稱之夷胸忍廖仲藥何射  
虎秦精等作白竹弩于高樓上射虎中頭三節白虎  
瞋志盡搏殺羣虎大咆而死秦王嘉之白虎歷四郡

害千二百人一朝患除功莫大焉欲如約王嫌其夷人刻石爲盟頃田不租十妻不算傷人者死殺人額死俟錢夷人安之漢興從高祖定秦有功因復之戶歲出實錢四十世號白虎夷亦曰板楯蠻所謂弼頭虎子者也桓順之世板楯數反太守趙溫降服于是宕渠出九穗之禾胸忍有連理之木光和二年板楯復叛天子欲大軍出益州計曹掾程包曰昔羌數入漢中得板楯號爲神兵羌人畏忌建寧二年羌復入漢賴板楯破之若徵板楯則蜀漢之民爲左衽矣馮

鯤南征亦倚板楯益州之亂李顯以板楯平之忠功如此本無惡心天子乃遣太守曹謙宜詔降赦晉書蜀載記曰巴西宕渠廩君之苗裔也昔武落鍾離山崩有石穴二所穴赤如丹者出務相姓巴氏穴黑如漆者出四姓驛氏樊氏柏氏鄭氏爭爲神相與以劍刺屋著者爲廩君務相之劍懸焉以土爲船彫畫之入水中日浮者爲廩君務相船獨浮遂稱廩君乘土船將徒卒當夷水而下至於鹽陽神女夜從廩君且爲飛蟲諸神從飛蔽日晝昏廩君遺青縷令嬰之乃

射鹽神死復下夷城登平石休其上立城居之其後  
種類遂繁○宕渠縣故城俗名車騎城後漢車騎將  
馮緄所修故名流溪縣有車騎巖石刻郡國志謂車  
騎鑄巖刻石十有餘處皆漢隸也僅傳此耳按漢金  
石在蜀者八十九處武帝太初三年南川心坎巖哀  
帝建平五年灌縣范功平治道記郫縣五官像碑光  
武帝建武二十年樂山修官二鐵盆中元元年榮經  
尊礎閣碑神水閣記二年榮經蜀郡太守治道記明  
帝永平元年灌縣治道記二年巫山鐵盆章帝建初

二年忠州修道碑眉州張氏穿井記和帝永元六年永康攻石題八年夾江磨巖王君平鄉道碑元興元年新都王稚子二闕安帝永初六年眉州羊竇道碑七年眉州官壑蜀中延年柳元初六年渠縣賜馮煥詔碑永寧二年大竹馮煥殘碑渠縣馮煥神道建光元年達州馮煥碑順帝永建四年金堂張子陽碑五年內江陳君閣道碑棧道記永和七年夾江開道碑桓帝和平元年忠州楊信碑建和二年漢州王君石路碑元嘉元年巴州丁魴碑永壽元年成都益州太

守碑延熹二年忠州江原君闕巖孝子碑五年葛系  
報恩寺真道冢地碑七年雅州造橋碑梁山巖舉碑  
永康元年渠縣馮親碑靈帝建寧元年涪州劉護門  
道二年黔江柳莊敏碑五年什邡輔國侯熹平二年  
洪雅張普張道陵碑渠縣李翊及夫人碑四年雲陽  
鄭子真碑五年綿竹沈子琚碑光和元年雲陽徐氏  
紀產碑中平五年巴縣張納碑六年成都石室梁壁  
歲月記獻帝初平五年成都文翁石柱記建安七年  
巴縣盧豐碑十年蘆山樊敏碑十四年雅安高頤碑

高直碑二十六年彭山仁壽黃龍甘露碑此年歲可  
考者五十一處成都學生題名碑故吏題名碑詔賜  
功臣碑楊侯伯碑綿州仲秋下旬碑巴縣薛劉二君  
碑益州刺史碑忠州丁房闕屈原碑涪州龐肱闕王  
君碑漢州司馬孟臺碑梁山張禪浮蘭碑五大夫碑  
富順董孝子碑夾江楊宗碑楊暢碑綿州李頊碣張  
翼碣平楊碑閬州上蔡碑廬山兩面碑雲陽金君闕  
金恭碑金廣延碑彭山楊洪碑資陽宏農碑王褒碑  
什邡馬融碣新繁洵堰碑渠縣城壩碑交趾都尉碑

梓潼李業闓雍勸闓范伯友闓五婦碑內江大尉墓  
此年月無考者三十八處

儀隴縣故闓中地也梁天監元年分置隆成郡儀隴  
縣大同中分置伏虞郡宜漢縣又置大寅縣屬巴西  
郡隋廢郡以大寅儀隴屬蓬州改宜漢爲伏虞屬巴  
州唐武德三年分置方州三縣屬之八年州廢仍屬  
蓬州廣德元年改大寅爲蓬池元至元二十年省蓬  
池伏虞入儀隴屬蓬州 國朝改屬順慶府○縣以  
大儀山名也山極高峻每覘烟雲可以卜晴雨上有



高明井冬溫夏涼大旱不涸左巖有乳香石狀如乳  
水自乳出右巖有金堆洞亦名仙姬洞晉縣尹張英  
遇仙處英初過采石江遇美女約會於太僕山抵任  
半載嘗聞機聲率吏逐聲而往見洞門半啟前女出  
迂攜入而洞閉矣隙出圓石一隻衆欲取歸重不能  
舉因爲塑其像今永濟廟祀張英也金城山在治北  
亦名金粟山四面懸絕石壁高八十丈周五里唯西  
南稍通人馬上有月井還樸洞佛龍洞朝陽洞舊治  
本在山頂開元二十六年始移山下爲今治治東南

六十里蓬池故城東八十里伏虞故城

渠江又南經李渡

渠江又南經兩河口受小流江小流江源出北觀山東南經雙河口又東經營山縣城北又東南經相如故縣南爲高灘河又南爲黃渡河入渠

渠江又東南爲篆水

亦名涸水曲尺灘下冬月水涸有石積出焉極爲平坦春水生則躡沒而深不盈尺每日光照映金波透徹其年若登則波紋宛成篆籀漾涸波面邦人以之

卜歲此篆洄之所由名也其灘有三十六水之灌輸  
其間者渦浮渠別莫知其幾中兩渠相距廣二尺深  
半之可受流觴天巧致然非人力疏鑿唐元稹詩云  
渠江明淨峽透迤船到名灘拽筴遲宋張無盡詩云  
濃洄江水瀉高灘謂此也有龍鏡潭水圓如鏡宋刻  
龍鏡二字於石有琉璃淵兩水相映其一紫碧痕如  
羅帶其一淡青痕如琉璃皆在篆水左右明邑人吳  
伯通投以糠粃篆成石谷二字故爲篆水伯通官按  
蔡使以道學自任稱石谷先生名勝記曰江中沱磧

有若鸛鶴若龜蛇若繫繚若張繖若明月之清圓若  
神仙之遊戲皆以形似得名名賢韻士每過其處爲  
之流連題詠焉

渠江又南經廣安州城東受濃水濃水源出龍扶疎山  
西南經岳池縣城東爲紅巖河又南受洞定溝玉河溝  
二水又東受靈溪又東經白鶴橋會沙溪黃連溪又南  
受長溝入渠

渠江又南經合州東北注于漢

廣安州故宕渠安漢墊江三縣地也梁普通三年分

置始安縣屬北宕渠郡隋開皇十八年改資城縣唐武德元年復爲始安又分置豐樂縣入年省豐樂天寶元年改始安爲渠江宋開寶二年分合州之澧洞新明二鎮置廣安軍淳祐三年徙治大良坪咸淳二年改寧西軍屬梓州路元至元十二年軍廢二十年改廣安府屬順慶路明洪武四年廢府爲州省渠江入之○宋何行中廣安注泊記曰南連巴徼北接通川復嶺東橫清江西下林溪簪密巖穴幽邃信奇觀也

長年云渠江有兩派一派自達州木頭石入渠縣境  
流五十里至三匯一派自巴州經達州由清河入渠  
縣境流五十里至三匯鎮二派合流又一百五十里  
經洗菜灘婁星灘十二門殺星灘洪溪口長磧灘南  
奔灘金浪子大南陽小南陽皂角灘冲天潛鴟子濠  
猴子巖石馬濠瓦蠅灘白飯灘梳江溪至渠縣東轉  
西南一百九十里經母猪灘李渡羊禿子喜逆子金  
龍灘火米三灘蓼葉灘蕭溪竹節灘鵝灘漏坑灘梁  
灘亂巴灘石板灘流碑灘大奶灘小奶灘瓦窰磧鳳

風磧宜灘黑灘漫沱三溪河三十六灘達廣安州城  
東又一百九十里經老虎嘴大浪子小浪子丁浪子  
丁灘官灘瓦盆灘湧灘清溪灘明月灘芙蓉灘魚洞  
子羅灘茄灘伏流灘羅渡溪鐵線灘皂流灘蓮花灘  
張局灘葉溪虎子巖牛渡滾灘狗竇子渠灘虎跳子  
朗灘金灘石咎灘丈八灘門絆子箕星石渠河口百  
九十里合州城東北十里入嘉陵江

蜀水經卷之十五

京山李

涪江

涪江源出松潘廳北雪欄山與龍泉

雪欄山在廳東三十里山勢蟠蜒積雪不消俗呼寶  
頂山山頂有穴曰風洞多惡風每午輒作灰沙蔽天  
寒氣襲人觸之多死漢書曰涪水出剛氏道徼外南  
至墊江入漢過郡二行一千六十九里水經注曰涪  
水出廣漢屬國剛氏道徼外流經涪縣西寰宇記曰



源出松州西北崆峒山

涪江又東經紅巖關

涪江又東南經小河營城西又南受木瓜水又東南受水進河又東南受黑水

涪水淺隘謂之小河營以水名也明洪武初置小河守禦千戶所屬松潘指揮使司正德間設涪陽戍

國朝康熙八年改守備屬松潘鎮

涪江又東受仙女水仙女水源出縣西北仙女山西南入涪

仙女山洞穴幽遠有石乳融結白潤如玉水自洞中流出

涪江又東南受華搭水又東受白馬河白馬河源出摩天嶺西南經陽地隘又西入涪

陽地隘土官三駐龍安府城長官司土通判俱宋崇寧進士龍州判官揚州王行儉之後土知事宋景定進士龍州知州歷城薛巖之後

涪江又南經龍安府城西而南折而東南流

龍安府故剛氏道地也漢置後漢置陰平道屬廣漢郡

蜀漢置陰平郡廣武縣晉太康元年改平武梁大通  
初爲楊傑李龍遷所據西魏分置建陽郡秦與縣馬  
盤郡馬盤縣而平武如故廢帝二年置龍州隋開皇  
三年罷郡十八年改秦興爲方維大業初改龍州爲  
平武郡義寧二年改龍門郡尋改西龍門郡唐武德  
爲西龍門州又置沙州以方維屬之貞觀元年州廢  
省方維入景谷省平武入江油垂拱改西龍門爲正  
州天寶改正州爲江油郡馬盤爲青川縣乾元元年  
郡爲龍州屬劍南道宋爲龍州江油郡政和五年改

政州紹興元年復爲龍州屬利州西路端平三年廢  
青川元置龍州宣慰司屬廣元路至元二十一年省  
縣明洪武四年置青川千戶所及思義安撫司二十  
三年改龍州千戶所宣德七年改宣撫司嘉靖四十  
五年改龍安土府萬曆十九年平薛氏改流置平武  
縣 國朝順治十六年省青川所入之○龍州舊治  
江油戍今名舊州壩在縣東一百二十里宋寶祐六  
年徙雍村宋進士雍繁孫所居在江油縣西北元至元  
中徙武都興教鎮在江油縣東北明洪武七年徙青

川二十三年徙樂平鎮永樂十年徙箭樓山麓盤龍  
壩卽今治也縣東南一百二十里陰平故城東北二  
百二十里方維故城東北九十里青川故城○陰平  
郡東抵漢中南聯梓潼西隣隴西北界酒泉魏景元  
元年鄧艾侵蜀自陰平行無人之地七百餘里鑿山  
通道造作橋閣山高谷深至爲險難艾以毡自裹推  
轉而下將士攀木緣巖魚貫而進先登至江油降蜀  
將馬邈遂進涪梁天監十四年魏人侵蜀蜀將任太  
洪自陰平入魏晉壽誘氏羌絕魏道路十五年將軍

王光昭與魏戰於陰平皆漢陰平道也華陽國記曰  
剛氏縣涪水所出平武縣自景谷有步道徑江油左  
僮出鄧艾伐蜀道任豫益州記曰陰平縣北有左擔  
道其路至險自北來者擔在左肩不得度右肩也鄧  
艾東馬懸車之處

涪江又東受古城水古城水源出縣東鐵蛇壩南爲羊  
盤溝又東南經古城入涪

涪江又東受高村水高村水源出大黃坪番界東經白  
草舖入涪

涪江又東經縣故城西

卽江油戍也

涪江又南經江油縣城東南

江油縣故剛氏道也漢置屬廣漢郡蜀漢改置江油戍屬陰平郡西魏改江油郡江油縣隋廢郡唐貞觀八年廢縣元至正中復置縣明洪武初省縣入梓潼十四年復置屬劍州嘉靖四十五年改屬龍安府○今江油實古之平武今平武實古之剛氏道

涪江又南受龍潭溪龍潭溪源出縣東北寶圖山南經

石聖巖入涪

唐主簿竇圖字子明棄官隱山中李白送竇主簿詩  
卽其人也山高三十里西接長岡可通車馬東臨峭  
壁陡絕一隅田鬼門關屈曲而上石筍如岡頂有兩  
巖中破一濶二十餘丈一濶數丈攀躋險絕人所不  
到以鐵索渡巖得子明金像其索飄搖人不敢渡獨  
寺僧得渡

涪江又西南經中壩北分二派繞壩而南合流

涪江又南分二派繞彰明縣城東西而南合流受青漪



江青漪江源出藥叢山之南羌巖又東南爲平通河又南受大印水又南受百漚溪又南經讀書臺又南經城西入涪

彰明縣故涪縣地也晉武僞置漢昌縣西魏改昌隆縣屬金山郡唐武德三年分置顯武縣文義縣貞觀元年省文義神龍元年改顯武爲興聖先天元年改昌隆爲昌明縣屬綿州開元二年省興聖尋復置二十七年廢後唐改昌明爲彰明 國朝順治十六年省入綿州雍正六年復置屬綿州今改屬龍安府

青漪江亦名長江亦名小江亦名讓水按劉宋時范  
栢年對明帝曰臣鄉有廉泉讓水今褒城縣西南百  
二十五里有廉水源出巴山密谷東北流逕雙乳山  
又北逕中梁山南讓水流入之又東北注漢水魏書  
謂華陽縣有廉水賈宇記謂龍岡有廉津廉水所經  
水經注謂廉水出巴嶺山北流逕廉川皆褒城之水  
也俗因太白之青蓮訛清廉水讓水○讀書臺是平  
源湧起小山亦名康山亦名戴天山亦名大匡山山  
勢高聳狀如匡字唐李太白讀書於此杜詩云匡山

讀書處頭白好歸來太白彰明人故曰讀書處時土  
元二年子美在蜀太白已釋夜郎故曰歸來黃鶴杜  
注指潯陽匡廬山然廬山稱匡廬無匡山之名說者  
謂蜀之匡山爲附會則改匡廬爲匡山者獨非附會  
耶又平武牛心山江油點燈山亦名小匡山皆有太  
白讀書臺

涪江又南受蜜溪蜜溪源出茂州東北相公嶺爲神溪  
東受馬蹄溪都流溪又東經石泉縣城西爲石泉水又  
南受甲竹水甲竹水源出甲竹喇嘛東南經白草壩又

東南入蜜蜜溪又東經天倉山又東受沙溪沙溪源出平武縣南水沙壩東南曲流經通口入蜜蜜溪又東受白泥水白泥水源出石泉縣東金錢壩南入蜜蜜溪又南爲石板河又東南經漫坡渡入涪

漫坡渡卽蠻婆渡在清廉鄉亦名青蓮壩蜜溪入涪之口俗稱蜜溪爲廉水以此也世傳唐李太白生處考太白生武后長安元年卒於肅宗寶應元年十一月壽六十二神龍初太白父客自西域潛還廣漢則太白之生五歲矣青蓮鄉是其故居非生處也志附

嘗謂其母浣紗渡口鯉躍入懷而孕亦何可笑

石泉縣故廣柔地也晉廢於羌後周置北部郡北川縣隋廢郡以縣屬茂州唐貞觀八年分置石泉縣屬茂州永徽二年省北川入之宋熙寧九年改屬綿州政和七年置石泉軍宣和三年軍廢仍屬綿州七年復置軍重和元年置會同靖安嘉平通津橫望平龍凌霄聳翠連雲九堡領之寶祐中軍移龍安元中統五年置安州明廢州改屬成都府嘉靖四十五年改屬龍安府○城南一里石紐山亦名石鼓山朝暮五

色霞氣爛然上有二石相結如紐每冬月雪霜之晨  
見白毫光自紐而出直射雲霄縣北二十里九龍山  
山有九嶺如九龍起伏其第五嶺下剝兒坪血石滿  
溪山頂鑄禹穴二字古篆書是夏禹生處愚按易林  
曰舜升大禹石夷之野吳越春秋曰禹家於西羌地  
名石紐石紐在蜀西川註曰石紐在茂州石泉縣其  
地有禹廟相傳六月六日生水經注曰廣柔縣石紐  
鄉禹所生也元和志曰禹汶山廣柔人生於石紐鄉  
路史注曰石紐在汶山縣西番界龍冢山之原青城

記禹生於石紐起於龍冢龍冢江源岷山也有禹廟  
鎮山上廟平八十畝每朔望池自漏繼有水給千口  
吳越春秋有莘氏女嬉於岷山得薏苡感生文命禹  
遁甲開山圖榮氏注女狄暮汲石紐山下泉中得月  
精如雞子愛而吞之十四月生禹蜀本紀禹生石紐  
涪兒畔禹母吞珠孕之折副而生華陽國志禹生於  
石紐村任豫益州記廣柔之石紐村其地名剗兒坪  
夷人共營其地方百里不敢處及畜牧有罪者逃之  
捕者不逼三年則原之畏禹之神也十道記石紐爲

秦州地隨巢子禹生碣石之東斯繆矣據此則石泉  
之有禹穴信也今會稽亦有禹穴則葬穴也括地志  
謂石紐山在汝川縣西七十三里寰宇記謂在汝川  
縣北四十里皆與今不合又石紐山有蚺螭碑字畫  
奇古夏禹所書然蚺螭山在衡山此摹刻者

涪水又南經蝦蟆灘

灘口有石如蟆張口向南城中無蚊蠓之患明宏治  
中州牧汪洪鑿石修朱容堰蚊蠓復生

涪水又南經綿州故城東



舊州城在沙洲之上今爲金山驛涪水四繞屹然金湯之固也後漢建武十二年臧宮從涪水上拔綿竹破涪城斬公孫恢建安十六年昭烈由墊江徑詣涪城蜀漢延熙四年蔣琬疏稱涪水陸四通唯急是應若東北有虞赴之不難由是自漢中還住涪魏景元四年鄧艾從陰平邪徑經德陽亭趨涪遂取蜀梁天監四年魏將邢巒使王足破梓潼進逼涪城巒表言自南安向涪方軌無礙脫得涪城則中分益州之地斷水陸之衝孤城何能持久承聖二年西魏將尉遲

迥入蜀取劍關至涪水潼州刺史楊乾運以城降烈  
分軍守之是州城爲古重鎮也城外西北有越王臺  
高百尺圖經謂唐顯慶中太宗子越王貞爲綿州刺  
史日建然唐史越王傳無刺綿州事

涪水又南受乘水

水經注有乘鄉卽此水也俗訛爲沉香舖

涪水又西南經無功灘

唐明皇幸蜀姜皎扈駕至綿州畫角應於督郵亭壁  
刺史摹諸石於州堂後鷹隼不敢入城後守再摹易

前碑將載歸至城南舟壞沒於潭歎曰無功矣因名其灘

涪江又南受安昌水安昌水源出石泉三面山之龍湫東受茶坪水茶坪水源出千佛山東南受蘇包水又東南經桑棗園北又東北經安縣城西南又東入安昌安昌水又東南經綿州城南入涪

水入涪處爲芙蓉溪卽東津杜甫所觀打魚者

安縣故綿竹縣地也晉孝武帝平蜀後置晉興縣益昌縣又僑置西充國縣屬巴西郡西魏省晉興入益

昌後周復置隋開皇六年改西充國爲神泉省益昌  
入之大業三年廢晉興唐武德元年置金山縣三年  
改金山爲龍安永淳元年復置益昌改西昌屬綿州  
宋熙寧五年省西昌入龍安政和七年改屬石泉軍  
宣和元年改龍安爲安昌縣尋復故寶祐中移石泉  
軍來治元中統五年置安州省龍安神泉入之明洪  
武七年改縣屬成都府 國朝雍正五年改屬綿州  
涪水又南經豐谷井

故鹽泉縣也寰宇記曰地有鹽井民得採漉爲四方

賈售之地

涪水又南經涪城縣故城

在州西北六十里界於潼川四山如城涪水經乎其  
中漢設涪城縣於此昭烈自葭萌襲蜀進據涪城

涪江又東南經潼川府城北

潼川府故郿縣地也宋分置新城郡北五城縣齊廢  
新城僑置涪平郡涪城縣梁置新州西魏改州爲昌  
城郡改北武城縣爲昌城縣改始平爲涪城郡周改  
涪城爲安城郡隋開皇廢郡改昌城爲梓州涪城縣

爲安城縣十六年又改安城爲涪城屬綿州大業初  
復改梓州爲新城郡昌城爲鄴縣唐復爲梓州天寶  
改梓潼郡至德二年置劍南東川節度乾元復爲梓  
州廣德二年罷節度以州屬西川大歷元年又置二  
年廢尋復置十三年以涪城改屬梓州蜀王建改武  
德軍宋爲梓州梓潼郡劍南東川節度乾德四年改  
靜戎軍太平興國三年改靜安軍端拱二年復爲東  
川節度元豐三年加劍南咸平四年分置梓州路重  
和元年改潼川府元至元二十年省涪城入鄴明洪

武九年改潼川州直隸川北道省鄆縣入之 國朝  
雍正十二年改潼川府治三臺縣○涪城改三臺者  
治西五里三臺山縣所由名突起三級如泰階星山  
腰有石洞云是宋員外郎魯交之所居縣南九里臨  
江之澚有鄆王城是李驤將民食穀芋之城也漢鄆  
道縣城當在中江縣南銅山飛鳥皆鄆縣故地劉甲  
曰唐以前凡稱梓潼者卽今之隆慶稱涪者卽今之  
綿州惟稱鄆及廣漢縣乃潼川也○縣城左帶涪水  
右挾中江唐時涪水迤城每淫漲秋狂突堤蕩廬榮

陽公乃鑿江東疇地別爲新江東北注使水道與城相遠百姓賴之及宋而湮水復衝決慶元中提刑王勲依江埭伐石爲堤謂之王公堤

涪江又東南經印臺山東凱江注之

印臺山身方頂圓其形如印逆水而上倒影於凱涪二水之間旁立三小峯山半有慈雲洞洞有鑿泉唐咸通間左拾遺長沙劉蛻文冢在焉蛻字復愚桐廬人寓居於此

涪江又東受桃花溪桃花溪源出稻花壩東入涪



桃花溪種桃滿岸掩映清流黃龍山一峯獨出橫枕  
其上益州記曰桃花溪在州東三十里從涪城縣南  
入涪水明楊廷和秋林驛有詩曰桃花溪水繞山流  
蓋溪水經秋林驛也秋林本作楸林

涪江又東受雙溪雙溪源出映溪山東入涪

映溪山峯形如半月溪出其麓每當朝陽初上山映  
波心

涪江又東經金華山

金華山上拂雲霄下瞰涪江杜子美詩涪右衆山內

金華紫崔嵬也有唐陳子昂讀書臺唐大歷中東川節度使李叔明爲立聽德碑明成化中縣令郭鎰爲作感遇亭以子昂有感遇詩也明初獻王初入蜀夢陳子昂冠冕來謁曰射洪土神護駕因立祠祀之世遂謂子昂爲蜀土神又山上有初平遺迹因篆字烟墩嶺旁有碑云漢仙人黃初平叱石成羊處

涪江又東梓水注之

涪江又東爲武水

射洪縣東七里東武山以經武水之東爲名武水卽

涪江也

涪江又東南經通泉山

通泉縣以山名也故治在射洪縣南四十五里山有石蝦蟆高七八尺東臨涪江絕壁二百餘丈有水從山頂湧出下注涪江

涪江又東南經青堤渡受楊桃溪

涪江又東南經伏龍山

紀勝曰在蓬溪縣客館鎮北二里下有火井地窪若池以薪引之有聲隱隱出地中少頃炎熾夏月積雨

涪水則燭生水上水爲之沸而寒如故冬月水涸則  
土生焰觀者至焚衣裾按儀隴縣南三十里亦有火  
井水涸之時火投其中焰從地中出可以禦寒移時  
方滅若掘深一二丈頗有水出與此不同而皆與隗  
爲富順之火井異地氣之不測如此是知水火一物  
陰陽一理分之則兩相害亦兩相成合之則兩相生  
亦兩相化

涪江又東南經長江故縣南

長江縣舊治靈鷲山上元二年移白桃川又移明月

山下按明月山在蓬溪縣西七十里有長江故城山下有賈島墓雲臺編謂賈浪仙家於長江方輿勝覽謂長江縣有賈島墓鄭谷有長江縣經賈島墓詩李頎有過長江傷賈島詩則似明月山之墓可據然蘇絳誌其墓稱安岳縣移風鄉今安岳縣南三里安泉山有墓廣明庚子東蜀從事上谷史圭表其墓曰於戲有唐詩流賈君之墓夫島由長江主簿遷普州司戶參軍而卒則當葬安岳矣唐杜荀鶴詩云山根三尺墓人口數聯詩曹松詩云先生不折桂謫去抱何

寃薛能詩云左遷今已矣清絕更無之李洞詩云位  
卑終蜀土詩絕占唐朝李頻詩云無限風騷句時來  
月下開宏秀詩云詩僻降今古官卑悞子孫崔塗詩  
云雕琢文章字字精我來此處倍傷神劉滄詩云碧  
雲迢遞長江遠句多苦吟歸思難鄭谷詩云水邊荒  
墳縣路斜日落風吹鼓子花黃滔詩云若把長江比  
湘浦離騷不合自靈均張蠙詩云生爲明代苦吟身  
死作長江一逐臣是唐時莫不重其爲人也故島卒  
葬普州而長江士民亦設虛冢以誌景慕今直隸房

山縣島故里也亦有虛冢焉白華文鈔曰當塗青山  
之北有李白墓南卽賈島墓鄒谷詩所云幽魂應自  
慰李白墓相連者也賈爲范陽人李東陽弔之有百  
里桑乾繞帝京葬來詩骨青山瘦是房山賈島峪亦  
有墓焉乃其卒于普州葬於城南安泉山具載蘓絳  
所爲墓志李洞則曰旅葬新墳小釋宏秀則曰死葬  
蜀山根賈墓之在安岳無疑也新書賈初爲浮屠名  
無本韓愈教其爲文遂去浮屠舉進士不第韓集有  
送無本師歸范陽詩作于元和六年辛卯之冬以會

昌癸亥賈卒之年計之賈時年三十有五而嘉話錄  
謂賈於馬上練句不覺衝韓尹第三節韓尹京兆在  
長慶癸卯與賈相識且十餘年安得有衝節被擁之  
事若據言言賈騎驢吟落葉滿長安之句唐突京尹  
劉栖楚被繫一夕始釋與新書較合第劉尹京兆在  
敬宗之時賈年且五十其事恐與劉無與也至遺史  
言無本居法乾寺遇宣宗徵行于賈案取詩卷覽之  
賈攘臂奪去既而知之亟謝罪乃除長江簿據言又  
言賈遇武宗于定水精舍尤肆侮慢武宗訝之授長



江簿宣宗嗣位在賈歿後三年而武宗卽位之初賈  
已簿長江惟文宗常患進士浮簿落第授簿容或有  
之此新書以謂坐貶蕪絳以謂羅誦也愚按鳥集中  
有宣宗大中八年墨勅平陽王遠跋謂大中恐是太  
和字野客叢書謂後人所擬以附會遺史之說

涪江又東南經明水寨受鄴水鄴水源出銅山東受小  
鄴江小鄴江源出蓮池鄉東合金水經飛鳥山下入鄴  
鄴水又東經雲臺山又東受瑰溪瑰溪源出峽山東流  
合靈溪石鹽溪入鄴鄴水又東經鄴口入涪

銅山漢時冶鑄之所側有泉水噴流如飛名飛來泉  
卽鄴水之源澄清如玉亦名玉江在中江縣西南雲  
臺山有梅花石石紋如梅雨過則現峽山兩闕如劈  
絕壁二百餘丈水注下爲龍潭在三臺縣東南

涪江又南受九節溪九節溪源出青石嶺西入涪

元和記謂灘有九節因以名溪益州記謂青石嶺有  
九折因名九節嶺其石青色可爲鍾磬采者必先祀  
其神相傳漢高時巴蜀爭界久而不決一朝密霧石  
爲之裂自上及下破處直若繩引於是州界始判今

山在縣東南一百九十里合州西二百四十里爲兩  
邑之界然則又一愚公谷耶

涪江又東南受馬桑溪馬桑溪源出高鳳山東南受赤  
溪又西南經蓬溪縣城東赤城山下爲蓬溪又西南經  
利國鎮又西南經白水鎮又東南經傘子山浮山壩入  
涪

勝覽曰傘子山在小溪縣白水鎮環山之民素以植  
蔗凝糖爲業相傳唐大歷間有僧教以凝成糖霜色  
如琥珀遂爲上品

蓬溪縣故廣漢地也晉永和十一年置巴興縣屬遂寧郡西魏改巴興爲長江又置懷化郡晉興縣隋廢郡以縣屬遂州十八年改晉興爲青石唐永淳元年分置唐興縣景龍二年分置唐安縣長壽二年改唐興爲武豐神龍元年復爲唐興先天二年廢唐安天寶元年改唐興爲蓬溪宋熙寧六年省青石入遂寧七年復置元至元十九年省長江青石入蓬溪屬遂寧州明洪武初改屬潼川州○名勝記曰縣有三興之號晉爲晉興巴興唐爲唐興也

涪水又南經廣山之下

山極孤峭斗入江心下有龍潭龍動而山亦搖焉有  
銅鑄唐明皇像殿柱上有葛璜題字削之愈明絕頂  
白鷺巖有葛仙洞無名氏石刻曰幾次江頭鎖翠烟  
一峯插立已參天我來直上無人識贏得清閑半日  
眠

涪江又東南經遂寧縣城東

宋時水從大木山經府城外南北平原數十里其後  
西徙爲城郭惠明正德庚辰邑人席書議塞揚渡口

疏乾河使江流經大木山下端本塞源爲上策塞光  
虎口濬江東流使文家口江岸不受衝激爲中策運  
河東土石專塞文家口使江流不能衝圯爲下策縣  
令劉樽用其中策開濬中洲導水而東久之西岸復  
圯嘉靖戊申縣令蕭禹臣於老官廟迤北石護隄岸  
一百五丈又增廟南花堤九十三丈嘗欲修築苟濠  
口不果其後乾河決每秋漲則兩江並行

遂寧縣故廣漢地也後漢分置德陽縣晉永和十一  
年置東廣漢郡小溪縣元初二年廢東廣漢隆安二

年置遂寧郡齊爲東遂寧郡西魏恭帝改小溪爲方  
義周保定二年置遂州改東遂寧爲石山郡廢德陽  
入方義大象二年改遂州爲信州隋開皇廢郡仁壽  
二年復爲遂州大業改州爲遂寧郡唐武德復爲遂  
州景龍元年分置遂寧縣天寶改州爲遂寧郡乾元  
復故屬劍南東道大歷二年置靜戎軍乾元四年改  
武信軍宋爲遂州遂寧郡太平興國二年改方義爲  
小溪政和五年改遂寧府屬潼川路元至元二十年  
改遂寧州明洪武初省小溪入之九年改縣屬潼川

州○縣治故小溪而遂寧故城在縣西南七十里劉  
儀鳳南樓記曰平原沃野貫以涪江氣象宜舒爲東  
蜀之都會李石賦曰山維東蜀如連如伏此貞觀之  
所以建督府而我宋之所以壯龍邸也水控內道或  
正或譎此劉豫之所以策譙縱而魯奇之所以抗閩  
孟也建安末昭烈入蜀使張桓侯由墊江入定巴西  
蜀將張裔拒之德陽陌下軍敗還成都晉永寧元年  
廣漢太守辛冉爲李特所攻奔德陽大安元年詔以  
張微爲廣漢太守軍德陽復爲特所破二年荊州刺



史宋岱救成都軍次墊江前鋒孫阜破德陽遂徑至涪永和三年將軍楊謙因鄧定之變棄涪城退保德陽寰宇記曰遂州蓋德陽之舊壘東與巴郡爲界譙縱叛後移於石坪愚按後漢書注引華陽國志云德陽縣有劍閣道至險劍閣至德陽六百餘里不應隸屬當是漢德縣之訛

涪江又南受卜油溪卜油溪源出梵雲山東經縣城南入涪

土人每人日出遊以清油置溪水中觀其暈以占休

咎梵雲山舊名中隱唐天寶中改名在城南三里四面懸絕東臨涪水西枕靈星池

涪江又南經壁山

壁山黃羅巖高十餘丈勢甚陡峭巖上大石寬二丈許坦平如砥其色黃謂之黃羅帳宋靖康丙午鑄大佛像於其上高八十尺畧與巖稱宋人立碑其上魏了翁題之曰鐘亭爲其澄潭水落倚欄俯照清見鬚眉也歷石磴而上踏聲如琴有石洞狀如堂宇

涪江東南受兜溪兜溪源出龍多山迴曲百餘里入涪

龍多山在蓬溪合州之界高明竊溪下瞰涪水烟雲  
出沒情態萬狀有砦廣五十餘丈方池滌泉清而不  
竭多唐人石刻而孫樵山記最爲妍麗所謂仙臺標  
異元踪斯存者謂馮蓋羅也蓋羅廣漢人隱于此山  
永嘉三年馮媼張氏汲水數見小兒啼乳之歸語姑  
令潛以線繫兒屨迹之得茯苓烹食舉家十七人仙  
去張不忍食享年百歲竊謂食茯苓而壽固有之矣  
仙去何往所未解也

涪江又西南受大安溪大安溪源出中江縣南飛鳥山

縈紆南下會鄴水支流東經普慈故城北又東經安居鎮爲安居水又東南經永樂里兩河口受石羊水石羊水源出樂至縣西北寶鼎山東流爲放生溪又東合通賢溪又東受魚海河又東入大安大安溪又東爲禁溪又東受九曲溪又東受磨溪又東爲關箭溪又東經安居縣故城南入涪

溪在安居衆水之闕孟蜀取魚於此號禁溪亦名官灘溪平灘一帶舊傳有瓊花浮水面而出號爲瓊江小舟通至遂寧之陽馬橋六十里

涪江東受赤水赤水源出大足縣東南玉口山石谷爲始龍溪北經昌州壩爲沙河又東經淮遠洞爲淮遠水又東經銅梁縣城西爲東流溪又東經平川受龍透山之烏木溪又東受六瀛山之馬灘溪又東爲宴渡河又東經合灘受單石溪單石溪源出大足縣玉口山南匯爲烏龍潭又南經雙石橋爲雙石河又東受跳石溪又東入赤水又東經樓灘受中峯山之浴溪又東爲立石河入涪

銅梁縣故資合二州地也周分置安居縣屬資陽郡

又改置安居郡柔剛縣隋開皇廢郡三年分置隆龕  
鎮十八年改柔剛爲安居屬資州大業十二年改鎮  
爲隆龕縣屬資州唐長安三年分置銅梁縣先天二  
年改隆龕爲崇龕開元二十三年分置巴川縣宋乾  
德五年省崇龕入安居寶祐中省安居入遂寧元省  
巴川入銅梁明成化十七年復置安居 國朝康熙  
元年省銅梁入合州六十年復置銅梁省安居入之  
屬重慶府

涪江又東經合州城南注於漢水

長年云彰明縣瓦店子紅巖子漫坡渡高阜鎮鏵嘴  
灘李家渡脊腰子阿彌陀佛灘三牛石龍門壩青衣  
壩何家集王家壩龜山灘綿州共一百里城墻角老  
鷹灘蓼葉灘碓窩灘蘆子灘鑼鍋碓大佛寺豐谷井  
共四十里月亮巖趙家渡鐘鼓樓亂柴灣葫蘆溪共  
四十里野寺灣湖成寺金家浩老馬渠黃水浩劉家  
營共五十里薜家梁青石扁荳腐灘高水井草壩場  
龍王廟石老虎仙人灘柳林子觀音渡忠孝渡潼川  
府共六十里白連子馬落巖白巖子麻衣洞石板灘

一包麵州窩沱石牛尾楊家壩共三十五里大牛鎮  
小牛鎮張家壩水中壩大字巖衝天消射洪縣共二  
十五里陡磨子鐵線堰白巖灘五郎廟鹽亭河棗子  
坪鬼錯路龍寶灘大石巖李家灘老皮棧蓼子濠螺  
蛸磧半面灘三堰渠古井口太和鎮共五十里獨龍  
背打鼓灘五顯巖磨腦灘窄巷子乾濠子老官灘楊  
桃溪共四十里六溪口北林寺青堤渡豆牛子施家  
梁碾槽濠康家渡走馬灘雞公嶺甌子沱羅船灘雲  
盤子桂花園共六十里女兒碑魚箭灘施家灣柑子



坪清浩灘老鹽關遂寧縣共四十里廣陽坪二郎灘  
大鬼塘石子溪流胡子石馬背老水沱烏木寺荷葉  
溪共五十里倒流子玉河灣米星渡沙蜂子魚溪口  
共四十里白龍觀獅子巖李子灣三塊石方家鎮白  
鱗灘利國灘觀音閣豹子口梓潼鎮共九十里老鴉  
石油草沱青巖子鷺鶯溪野猫溪金線塘鼈龜沱共  
五十里寡婦灘鹽井溪兩頭寺大河壩共十五里梭  
衣灘金猴子晒金壩橫梁子石灣灘布袋口花紅園  
全溪口關箭河安居縣共七十里磨盤灘撓擗石屏

牛子同溪鎮衛沱漕壩白鶴灘蛇倒退立石子烏木灘合州一百二十里

凱江

凱江謂之中江源出安縣東北鹿爬山爲龍安水

龍安有三西魏龍安在梓潼唐龍安在安縣明龍安在平武

凱江又南受神泉

泉自地湧出凡四十穴飲之能已痼疾宋趙汝澗中江新隄記曰江源出於龍安鹿爬山初若二帶溪僅

漸車至神泉始與諸谷溪水會爲一東至於羅江南  
至於陽平滙東南復吞芴流乃浩漾爲洪波

凱江又東南受黑水黑水源出安縣南浮山南入凱  
五代董璋破西川於黑水是也

凱江又東南經綿州城東爲羅江受潺水

潺水一名冷水溪與凱江兩水相蹙如羅文故爲羅  
江水經注謂潺水出潺山歷潺亭而下注涪水也李  
雄之亂移萬安縣治就潺亭卽今州城城北五里芒  
江堰永徽五年縣令白大信築北十四里楊村堰貞

元二十一年縣令韋德築

綿州故涪縣也漢置屬廣漢郡王莽改統睦東漢復  
故永初二年徙廣漢郡來治晉分置萬安縣太康中  
移郡治雒永嘉中移梓潼郡來治孝武還郡治梓潼  
寧康初沒于符秦太元元年復入晉爲梓潼郡涪縣  
又置潼州廢帝二年分置魏城縣屬巴西郡又改涪  
爲巴西縣又置萬安郡萬安縣隋開皇廢郡五年改  
郡爲綿州大業廢州爲金山郡唐武德元年復爲綿  
州三年分置鹽泉縣天寶元年改萬安爲羅江縣州

爲巴西郡乾元元年復改屬劍南東道宋爲綿州巴西郡屬成都路紹興三年置安撫使五年置川陝宣撫使六年罷宣撫二十一年罷安撫雍熙元年置四川制置使尋罷元至元二十年省巴西魏城鹽泉三縣入州改屬潼川路 國朝順治十六年省羅江入德陽雍正五年改州爲直隸州復置羅江縣乾隆三十五年徙州治羅江省羅江入之

凱江又南受蜂溪蜂溪源出白馬關東受桃花水又東爲芙蓉溪又東南曲流入凱

蜂溪亦名三柴水出白馬關白馬關本名鹿頭關迤  
北十里爲龜勝山漢龐統葬鹿頭關桃花溪東岸墓  
右有龍洞葬統時或見白馬自洞中出因名白馬關  
唐元和初劉闢叛據鹿頭關高崇文與之對壘屯營  
有龜現牙旗下令拔遠澗翼日復至及戰大勝因名  
屯處爲龜勝山按白馬關俗稱落鳳坡云龐統戰沒  
處統號鳳雛應諛考三國史統率衆攻雒城爲流矢  
所中而卒非此地也

凱江又東滙爲斜潭又東經陽平鎮又東逕空同山

空同山有洞容千人溪不可測

凱江又東經中江縣城西南爲中江

亦名五城水亦名南江水經注曰涪水又南枝水出焉西逕廣漢五城縣爲五城水宋眉山程建用書曰南江自綿之神泉縣來衝山足已而東走百五十里至郡城下合涪江東江來自涪城歷馬橋鎮過五成山至元武山下入於南江

中江縣故鄆縣地也漢置屬廣漢郡晉咸寧四年分置五城縣屬廣漢郡宋元嘉九年分置懷歸縣屬新

城郡西魏分置元武郡後周省懷歸隋開皇廢郡改  
五城爲元武十四年分置飛鳥縣仁壽初置凱州大  
業廢州屬蜀郡唐武德三年改屬梓州貞觀二十三  
年置銅山監上元三年廢監調露元年置銅山縣屬  
梓州宋大中祥符五年改元武爲中江元至元二十  
年省飛鳥銅山入之屬潼川州○縣南九十里有銅  
山故城西北二十里有懷歸故城獨飛鳥城未知所  
在李吉甫謂東北至州一百四十五里西南至飛鳥  
山五十五里究心形勢者當訪得之○晉寧康二年



符秦以姚萇爲寧州刺史治墊江爲竺瑤所敗退屯  
五城太元七年桓冲遣將楊亮攻蜀拔五城進攻涪  
城爲秦將張蚝所敗程建用曰五成在邑之良地山  
頭有二圓巖高徑各丈餘俗號挺眼五成者取爲壇  
五成之理今以成爲城蓋悞也愚按常璩謂漢時置  
五倉發五縣民尉部主之後因以爲縣則當時實有  
五城

凱江又東受東溪東溪源出涪城山西南流經城東又  
南經元武山下入凱

元武山亦名三嶠山周回三里六屈三起蜿蜒而來  
有龜蛇之象淵中產石石有陰陽陰文爲蛇陽文爲  
龜土人以作碁子謂之碁石相傳田真人與道士奕  
撒碁於江自是江中產碁石非也天生奇迹豈人所  
能爲哉唐王勃盧照隣嘗登此山旅眺倡和而勃又  
有元武山聖水泉序道君廟序廟山賦蓋自古名山  
也俗子勒大雄山三字于石壁山靈有知當笑其無  
狀而志亦別有赤雀宜君諸別名可怪也愚按王勃

於唐上元二年十一月七日題盤鑑圖云將之交趾

旅次南海見回文類聚是其父福時謫交趾令勃往  
省之時在高宗上元之乙亥明年儀鳳丙子溺海而  
卒年二十九計其生年當在貞觀二十一年戊申其  
待父至南昌作滕王閣序則顯慶五年庚申也其入  
蜀年二十則乾封二年丁卯也

凱江又東南受雙溪雙溪源出白蓮洞南瀉爲龍王潭  
又南經銅魚山入凱

凱江又東經赤巖

巖色如丹下有蛙石磯

凱江又東受濯筆溪

相傳李白訪趙蕤習書於此故名濯筆溪蕤習術數之學嘗著長短經

凱江又東經牛頭山入涪

牛頭山在三臺縣城外西南一里形如伏牛山半有洞與青神之中巖相通四面孤絕俯臨城郭舊多樓閣爲一州之勝唐王勃碑曰牛頭山者廣漢之名峯也圓裔幾乎數里直上逾乎百仞蒼岑隱鱗仿分玉砌之階碧洞透遙下超金陵之苑因危立戶跨險分

榮每至兩江春返四野晴初山川霽而風景涼林巒  
清而雲霧絕賞因時併筆爲神驅有情君子誰爲捨  
乎○勝覽曰鄴江源出銅山縣赤壁溪遶牛頭山足  
入涪石谷溪源出杜山下亦遶牛頭山入涪按赤壁  
石谷二溪入凱不入涪也鄴江由中江縣南溪流至  
蓬溪鄴口入涪何得以赤壁溪當之蓋因隋改五城  
爲鄴縣求所謂鄴江者而不得遂謬以名溪耳不知  
隋之鄴縣非漢之鄴縣也

梓水

梓水謂之潼水源出平武縣東北大業山

元和記謂陰平縣有岐江水下流卽梓潼水也

梓水又南經朝陽洞出爲潼水

水自黑牽洞入穴行七十里至朝陽洞口湧出而下  
瀉如瀑布夏漲更甚今名白陽洞寰宇記曰朝陽洞  
在龍州南八十里高九百丈陰洞潛穴氣蒸成川有  
飛泉下流一百里入陰平縣合白樺水

梓水又南經琅璫驛

亦名上亭唐明皇聞鈴聲郎當處碧雞漫志曰明皇

雜錄及楊妃外傳云帝幸蜀初入斜谷霖雨彌旬棧道中聞鈴聲帝方悼念貴妃採其聲爲雨淋鈴曲以寄恨考史及諸家明皇自陳倉入散關出河池不由斜谷路今劍州梓潼縣地名上亭有古今詩刻記明皇聞鈴之地庶幾是也羅隱詩云細雨霏微宿上亭雨中因感雨淋鈴相傳明皇宿上亭雨中聞牛鐸聲悵然而起問黃幡綽鈴作何語曰謂陛下特郎當特郎當俗稱不整治也明皇一笑遂作此曲梓水又南繞七曲山爲七曲水

山有張亞子祠世稱文昌神按文昌神本黃帝子名  
揮始造絃張羅網因以張爲氏周時爲山陰張氏以  
醫術事周公又爲張仲休無忌之遺腹子詩稱張仲  
孝友以直諫爲幽王所醜魂遊雪山化爲蛇五丁拔  
山被壓而死又爲趙王如意爲呂后所殺孝宣之世  
呂后後身爲邛池令呂牟戚夫人後身爲戚氏嫁張  
翁老無子瀝血石臼中願得一動物爲遺體因感生  
爲蛇食呂令馬呂令繫張夫婦將殺之蛇揚海水灌  
城邑皆陷所謂陷河也上帝以所殺多譴爲邛池龍



復生趙國張禹家名勲爲清河令卒又生爲張孝仲  
又生爲越巒張氏年七十三悟道而化又化形見姚  
萇期以後九年七曲山見尋萇隨楊安南伐蜀將至  
七曲迷道遊騎賈君蒙見一鹿馳去至廟門鹿自死  
追騎共剝之萇悟爲我設饌也因立廟然華陽國志  
已稱惡子祠則廟不始姚萇矣三餘贅筆曰梓潼神  
祠在處有之學宮事之尤謹梓潼爲四川屬縣四川  
上直參宿參有孝謹忠良之象其山水溪厚爲神明  
之所宅或謂斗魁爲文昌六府主賞功進爵故撮科

之士事之或謂神爲張宿之精或謂張仲孝友後身  
其說不可深考

梓水又南經五婦山爲五婦水

又爲馳江言水至此而馳急也漢書曰五婦山馳水  
所出南入涪行五百五十里華陽國志曰秦惠王許  
嫁五女於蜀蜀王遣五丁迎之還到梓潼見大蛇入  
穴五人攬尾掣拽山爲崩壓五丁併五女及將從死  
焉山因分爲五嶺蜀王登而望之命曰五婦冢築望  
婦塚臺曰思妻臺愚按婦當作阜說婦附會

梓潼縣漢置屬廣漢郡王莽改就都郡子同縣東漢

復故建安二十二年置梓潼郡西魏置潼川郡改梓潼縣爲安壽又置北陰平郡陰平縣尋改陰平縣爲龍安隋開皇廢郡大業三年改龍安爲陰平安壽爲梓潼屬普安郡唐屬劍州元省陰平入梓潼明改屬保寧府 國朝雍正五年改屬綿州

梓水又南受高涼泉高涼泉源出魏城驛南合魏城水魏城水源出青林溝經驛南金帶橋下流會高涼泉東

南受羅漢水又南入梓

唐元和間侍御李洎高涼泉記曰魏城縣南五里有長嶺高粱泉出焉發於一山玉溜潺湲衆竊成吟笙竿匪禁登之洗然如謁羣仙橫石如隕匪壑匪壑俯架絕壁根山不落其間可俯而入焉崕峒博敞如堂如室苔馱古狀奇怪生妍旋開混元益偉造物

梓水東南經鹽亭縣城西受雲溪雲溪源出負戴山飛龍泉南入梓

雲溪卽杜詩雲溪花淡淡也負戴山自劍門南來起

伏四百餘里至此而蹲有昭格祠祀隋張嶸嶸字峻夫洛陽人遊至邑遇姬泣云其女當生祭井嶸也張仗劍驅蟒嶸遁去戴山洞中張以巨石書紫微仙洞四字塞之害遂除唐平章忠穆公嚴震震從弟東川節度嚴礪二墓俱在山下又知湖州文同與可墓在永泰故縣之新興鄉碑題宋學士農部侍郎文湖州墓

鹽亭縣故廣漢郡縣也漢高帝六年置王莽改廣信後漢復故永初二年移郡治涪宋元嘉十九年分置

西宕渠郡宕渠縣齊改廣漢爲小漢尋省西魏改置  
宕渠爲方安郡宕渠縣爲鹽亭縣周保定中分置高  
渠郡高渠縣隋開皇廢郡以縣屬梓州大業三年廢  
高渠唐武德四年分置永泰縣宋乾德四年分置東  
關縣熙寧五年省永泰爲鎮十年置永泰尉司建中  
靖國初改永泰爲安泰紹興復置永泰縣元至元二  
十年省永泰東關入鹽亭屬潼川州○宕渠有四渠  
縣北宕渠也營山南宕渠也合州東宕渠也鹽亭西  
宕渠也宕渠故城在縣西北三十二里安樂村又故

廣漢城在縣東北十五里建武十一年公孫述兵廣漢以拒岑彭是其地也地包南部北逼漢水故曰廣漢至改爲廣魏移於漢州皆失之矣又縣東南百里有東關故城東北六十里有永泰故城西六十里有高渠故城

梓水又東循城南而東受瀾江瀾江源出南部縣南岨井西南受湍水爲小沙河又西南爲鵝溪又西南經城東董政山下爲鹽亭水又南入梓

鹽亭縣東北里許石壁奇峭俯臨一溪曰瀾水一名

鵝溪源自綿州衆壑聚成下流八十里過縣始轉東南合於梓潼水董政山亦名董叔山董叔隋開皇四年縣令有德政民爲立祠山上

梓水又經射洪縣東爲射水

射洪縣故廣漢地也魏恭帝分置湧泉郡射江縣周明帝分置通井縣又改射江爲射洪屬新城郡隋開皇廢郡三年改通井爲通泉十八年以通泉射洪屬梓州唐大歷二年通泉改屬遂州尋如故元至元二十年省通泉入射洪屬潼川府○梓潼水急如箭奔



射江口故爲射水蜀人謂水口爲洪故名射洪益州  
記曰婁樓灘東六里有射江土人訛江爲洪後周從  
俗因改射洪蛩溪詩話曰灘石激湍其中僅可容舟  
者謂之洪若大水則不復問洪矣楊用修雜字韻寶  
曰礪大壑也俗省作洪川中之射洪徐州之呂梁洪  
皆取此也

梓水又南爲白馬河經獨坐山入涪

獨坐山周一里高百尺南枕涪梓卓然孤峻如人之  
巍然獨坐也唐拾遺陳子昂之墓在焉郭廷謂詩云

魂逐東流水墳依獨坐山是也其故宅在東武山下  
杜子美詩云拾遺平昔居大屋尙修椽悠揚荒山日  
慘淡故園烟其讀書處在金華山杜子美詩云陳公  
讀書臺石柱仄青苔悲風爲我起激烈傷雄材